

勝蹟攷

朝邑志卷二

城池宮室關隘

王城 左傳僖公十五年晉陰飴甥會秦伯盟於王城杜預注  
王城秦地馮翊臨晉縣東有王城成公十一年秦晉將成秦  
伯不肯涉河治於王城 史記秦本紀厲共公十六年壅河  
旁以兵二萬代大荔取其王城徐廣曰今之臨晉也臨晉有  
王城 司馬彪郡國志臨晉有王城 太平寰宇記王城在  
朝邑縣東一里蓋大荔戎王之城

臨晉故城 史記郭解至臨晉張守節正義臨晉故城在馮翊  
縣西南二里 漢書地理志臨晉故大荔秦獲之更名 縣  
道記臨晉故城在朝邑縣西南一里 太平寰宇記漢臨晉  
在朝邑縣界後魏移置於此取故城爲名 通典漢臨晉縣

朝邑志卷一

一

故城在朝邑西南

懷德故城 史記匈奴傳注洛水在懷德縣東南入渭 漢書  
地理志左馮翊有懷德縣 水經注渭水東逕平舒城北城  
枕渭側渭水之陽卽懷德縣界也城在渭水之北沙苑之南  
卽懷德縣故城也世謂之高陽城非矣

武鄉故城 左傳僖公十五年王城杜預注王城後改爲武鄉  
南五泉故城 魏書地形志澄城郡有南五泉縣太和十一年  
置

河濱故城 唐書地理志武德三年析朝邑置河濱縣貞觀元  
年省

河西故城 左傳成公十一年晉卻犇盟秦伯於河西 唐書  
地理志朝邑乾元三年曰河西隸河中府大歷三年後曰朝

邑

朝邑故城 金趙抃藏春塢題名記曰左馮翊之東南三十里有縣曰朝邑

長城 史記年表秦靈公八年城塹河瀕初以君主妻河 通典魏惠築以備秦 通鑑綱目前編魏城少梁而秦塹河瀕蓋相備也 年表秦簡公七年塹洛 秦本紀孝公元年魏築長城自魏濱洛以北 三秦記在蒲城東五十里秦築長城卽是塹洛也 太平寰宇記秦孝公九年築長城簡公二年塹洛今沙苑城是也

案寰宇記云云皆誤

劉仲城 通典河西有劉仲城漢高祖兄封此

南芮卿北芮卿 史記秦本紀梁伯芮伯來朝小司馬索隱芮

朝邑志卷一

二

國馮翊臨晉 漢書地理志臨晉有芮卿故芮國 括地志

朝邑縣南三十里有南芮卿北芮卿皆古芮伯國

姚武壁伏陸壁 通典在河西縣西北

長春府 唐書地理志同州有長春府

長春宮 玉海在同州朝邑縣本周武帝作保定五年宇文護築隋開里中修之 隋書地理志朝邑縣有長春宮 唐書

里志朝邑有長春宮 通典縣有長春宮 通考同 隋

書高祖紀十六年十月己丑幸長春宮十一月壬子至自長春宮 唐書高祖紀高祖起義兵九月次長春宮太宗紀十二年二月甲戌如長春宮乙亥獵於河濱閏二月丙戌至自長春宮 冊府元龜開元八年十月辛卯幸長春宮壬午畋於華州之下邽庚寅遂幸溫泉十一月辛卯至自長春宮

通鑑貞元元年四月壬午馬燧渾城破懷光兵於長春宮南  
唐書馬燧傳賊將徐庭光守長春宮城燧度長春不下則  
懷光固守久攻所傷必衆乃挺身至城下見庭光庭光降  
唐蘇頲幸新豐及同州勅 勅虞之四朝且徧區寓漢之三  
輔本同京師善於古者考於今發乎邇者應乎遠若順預之  
一事缺則紊於王制巡遊之典備則慮於人勞朕受命膺期勵  
精設教幸乾坤幽贊風雨咸若百物既阜三農已登同穎薦  
於宗廟櫓穗生於郡國我無大桀實欣於歲取人有小康未  
果於時邁但左翊之地近八黃圖新豐之邑甫鄰青綺山川  
宮館咫尺相望欲過灞亭而涉灑經沙阜而臨渭見彼耆耄  
問其疾苦察長吏之政恤黎甿之冤蓋所以展義陳詩觀風  
問俗始自畿甸化於天下宜以今月二十五日幸長春宮停

五日緣頓所須並令所司支備一事以上不得干擾州縣發  
日唯量將飛騎萬騎行更不須別遣兵馬及妄有科喚朕此  
行之處不得進奉有路有稱冤苦州縣不能疏決者委御史  
金吾收狀爲進各勉所職副朕意焉 唐李虞仲授高重同  
州刺史兼防禦使制 勅漢號左馮翊分理浩穰近者非清  
名顯秩不在茲選正議大夫行給事中上柱國渤海縣開國  
男食色三百戶賜紫金魚袋高重沉原守道貞介操身以禮  
法爲踐履之徒以學行爲游泳之地堅金不耗止水無波穆  
然士風休有美論屬者侍周禁署駁議瑣闥重席有戴憑之  
名通經得陳邵之美侍從之暇傳益宏多移於牧人宜有善  
政吾以商原故地豐水攸同襟帶山川接畛甸服掌離宮之  
管鑰領近關之式遏俾揚風化思得兼材爾宜提舉政經蘇

息物力清靜率下以奉詔條用答寵榮勿替休問可使持節  
同州諸軍事同州刺史充本州防禦長春宮等使散官勳封  
賜如故 唐謝楚爲同州顏中丞謝上表 伏奉恩制授臣  
同州刺史本州防禦長春宮等使卽以今月八日到任上訖  
載服明命叨塵寵光逾涯之榮滿覆是懼某誠幸逢昌時早  
獲入仕由乎邑吏叅佐戎藩材謝中人官寧期達聖朝道廣  
菅蒯不遺遂得牧守連擢大郡徒以清心自約直質在公未  
申致命之誠久負竊位之責前秋屬奸兇構禍譟動諸方臣  
所部當州首爲劫脅乃藉天聲以告鄰境戮其僞將以阻奸  
謀蓋知無不爲是臣職分陛下特錄其微効超授方隅從政  
未洽於遠人進律俄遷於近輔非次之獎臣何以膺又臣伯  
父贈太師臣眞卿在肅宗朝嘗典茲郡餘蹤遺事較然可徵

朝邑志卷一

四

臣以不腆之姿繼序官業誠比德非省陳力異能而代受國  
恩若未失墜臣不勝感涕榮荷之至當今德澤被於寰宇薰  
風襲於隱微俗臻大寧吏易爲理臣專奉揚大化申報皇慈  
有未便於人者續具條奏以酬陛下子育之旨臣無任戴恩  
隕越之至 唐蘇頲奉和聖製至長春宮登樓觀稼詩 帝  
迹奚具遠皇符之所崇敬時堯務作盡力禹稱功赫濯惟元  
后經營自左馮變蕪香稻實流惡水泉通國阜猶前豹人疲  
詎昔熊黃圖巡沃野清吹入離宮是閱京坻富仍觀都邑雄  
憑軒一何綺積溜瀉晴空禮節家安外和平俗在中見龍垂  
渭北辭鴈指河東睿思方厝鑄宸遊若飲豐寧誇子雲從祇  
爲獵扶風 明王傳長春宮 長春宮殿無遺瓦往來遊人  
時駐馬垣堞摧頽狐兔穿耕犁不到如荒野想見宇文初創

基經歷隋唐修飾時花木亭臺紛綺翠楣楹金碧垂罽罍歲時車駕一行幸羽帳珠簾相掩映山川拱護似來朝輿衛周巡成勝境四面斬削何嶽崎一夫當關人笑窺高歡西伐嘆天險懷光據守難平夷要地竒跡事已非帝王行處草依依盛衰物理休惆悵回首高臺碧四圍

河橋 史記秦本紀昭襄王五十年初作河橋索隱曰爲浮橋於臨晉關也正義橋在同州臨晉縣東渡河至蒲州今蒲津橋也 通典縣有河橋秦后子奔晉造舟於河通秦晉之道北周書文帝本紀後魏大統元年東魏屯軍蒲坂造三道浮橋渡河 元和郡縣志蒲津關今造舟爲梁其置甚盛每歲徵竹索價謂之橋脚錢數至二萬 唐六典造舟之梁四河則蒲津 唐張說蒲津橋贊 易曰利涉大川濟乎難也

詩曰造舟爲梁通乎險也域中有四瀆黃河居其長河上有三橋蒲津是其一隔秦稱塞臨晉名關關西之要衝河東之輻輳必由是也其舊制橫亘百丈連艦千艘辦竹竿以維之繫圍木以距之亦云固矣然每冬冰未合春沍初解流漸崢嶸塞川而下如礎如臼如堆如阜或捩或捩或磨或切綆斷航破無歲不有雖殘渭南之竹仆隴坻之松敗輒更之罄不供費津吏咸罪縣徒告勞以爲常矣開元十有二載皇帝聞之曰嘻我其慮哉乃思索其極敷祐於下通其變使人不倦相其宜授彼有司俾鐵代竹取堅易脆圖其始而可久紓其終而就逸無疆惟休亦無疆惟恤於是大匠葺市百工獻藝賦晉國之一鼓法周官之六齊飛廉煽炭祝融理爐是鍊是烹亦錯亦鍛結而爲連鎖鎔而爲伏牛偶立於兩岸襟束於

中渾鎖以持航牛以繫纜亦將厭水物奠浮梁又疏其舟間  
畫其鷁首必使奔漸不突積凌不隘新法既成永代作則原  
夫天意有四旨焉濟人仁也利物義也順事禮也圖遠智也  
仁以平心義以和氣禮以成政智以節財心平則應諧百神  
矣氣和則感生萬物矣政成則乂文之經矣財節則豐武之  
德矣故天將儲其禎地將阜其用人將盈其力聖皇之道乾  
乾翼翼觀藝而無窮詠功而無極

蒲津關 竹書紀年魏襄王七年秦王來見於蒲坂關 史記  
曹相國世家參以中尉從漢王出臨晉關正義曰卽蒲津關  
也在臨晉縣故言臨晉關 漢書武帝紀武帝元封六年立  
蒲津關師古曰臨晉關在臨晉卽蒲津關 北齊書高祖紀  
後魏天平二年齊神武遣庫狄溫守封陵築蒲津西岸 通

朝邑志卷一

六

鑑胡三省注河中西關城在河西所以護蒲津浮梁者也  
唐書地理志河中府河西縣有蒲津關一名蒲坂關 元和  
郡縣志朝邑縣東南有蒲津關 柳宗元館驛使記自華而  
北界於櫟陽其驛六其蔽曰同州其關曰蒲津 宋白續通  
典蒲津關戰國時魏所置自河東而言亦曰蒲坂津自關中  
而言亦曰夏陽津 太平寰宇記蒲津關因在蒲坂又以河  
津之湊爲名 唐元宗早渡蒲關 鐘鼓嚴更曙山河野望  
通鳴鑾下蒲坂飛旆入秦中地險關逾壯天平鎮尚雄春來  
津樹合月落戍樓空馬色分朝景鷄聲逐曉風所希常道泰  
非復棄繻同 唐張九齡奉和聖制早渡津關應制 魏武  
中流處軒皇問道回長堤春樹發高掌曙雲開龍負王舟渡  
人占仙氣來河津會日月天仗役風雷東顧重關盡西馳萬

國陪還聞股肱郡元首詠康哉 唐徐安貞奉和聖製早度  
蒲津關 仙掌臨秦甸虹橋關晉關兩都分地險一曲度河  
灣路得津門要時稱古戍閑城花春正發岸柳曙堪攀後乘  
猶臨水前旌欲換山長安迴望日宸御六龍還

沙苑監 周書文帝紀齊神武逼華州知不可攻乃涉洛軍於  
許原西太祖令軍人齎三日糧輕騎至沙苑進軍渭曲大破  
之乃於戰所人種樹一株以表武功 魏書宇文泰以其地  
宜六畜置監豢養隴右牛羊諸畜以供上方之用

輔氏 左傳晉魏顆敗秦師於輔氏 路史輔氏晉大夫采  
朝邑舊志輔氏在朝邑縣西北二十里

條 長安志史記晉世家晉穆侯七年代條杜預注條晉地今  
朝邑西南有懷德故城卽條近焉

朝邑志卷一

七

乾坑 唐書德宗紀興元元年十二月渾瑊及李懷光戰於乾  
坑敗績

豐羊牧 通典苦泉側今置豐羊牧

石岸 在舊大慶關唐時築以禦金水

朝邑鎮 新市鎮 延祥鎮 洿谷鎮 並見金史

冢墓

漢司農丞景和墓 在縣東南寺後社 通志和成帝時人墓  
久湮

漢孔僖墓 在縣故城南隅 後漢書本傳僖章帝時臨晉令  
在縣三年卒官遺令卽葬

唐劉幽求墓 在縣東北五十里華原之麓金水之南 朝邑  
後志云非其真宅但墓旁有掘土者居民輒不安人以長異

之 續志按史幽求卒于貶所此不得有墓疑誤

唐禮部侍郎嚴譔墓 在縣西北一里 通志在長春故城西

南隅有祠 唐書本傳善思名譔以字行同州朝邑人開元

十六年卒

唐白馬將軍扈鏐墓 在縣西北二十里白冢鎮 後志云世

次無考

元王侍郎由義墓 在長春宮西北

元趙孝子良墓 韓志洪治中沮水嚙趙氏之墓墓崩有石曰

皇慶二年旌表孝子趙良 案今表石無考

明侍郎王良墓 通志在健兒村

明知府奚敏墓 續志在廓明村良敏二墓百餘年不顯今始

知之

朝邑志卷一

八

明通政周彧墓 通志在縣南沙底鄉僉事周道通判周瑄祔

明布政楊恭墓 州志在西莊續志自鎌山而西西莊里爲楊

布政恭墓

明御史李濟墓 續志在縣北懷恩里

明參政樊冕墓 通志在縣北石村

明參政喬誠墓 續志在縣東親賢里

明御史趙整墓 續志在樂豐里

明通政蕭斌墓 續志在縣東喜慶里

明侍郎蔚能墓 同州志能吏員至光祿寺卿禮部右侍郎有

廉掾 通志在朝邑縣西在華原西天順中勅葬

明知府劉讓墓 續志在東屯

明知縣上志墓 通志在上官村北



明知府劉偉墓 續志在龍門村

明郎中王蚤墓 續志在洛之南泊里子僉事朝雍孫知府三

省祔

明按察韓紹宗墓 通志在南陽洪續志洛以南南陽洪為韓

明公紹宗墓次子叅議邦靖從葬焉王九思撰墓誌銘

明寺丞楊珪墓 在縣西北二十里 韓志白家鎮珪太僕寺

丞喜修廉隅

明少保王之臣墓 同州志公潼關人萬歷乙未進士知洪城

縣忤權貴左遷秦州判歷山西赤城道以邊才巡撫宣大晉

兵部尚書督師遼陽特進光祿大夫太子太保在高家庄北

明知府牛斗墓 續志在縣西華原北

明恭簡韓邦奇墓 在朝邑縣西同州志在華原南嘉靖中勅

朝邑志卷一

葬

明叅議樊得仁墓 續志在洛南北石村

明知府段朝宗墓 續志在廉家庄

明御史嚴天祥墓 續志在縣東南望仙觀

明郎中王一治墓 在官庄村

明叅政王學謨墓 後志在張家庄從兄知府學古墓在通潤

村從子運使皞如墓在高城村

明御史雷士禎墓 後志在新市鎮從弟知縣元善祔

明按察王嗣美墓 後志在泊南從子布政于陞從孫知縣鑰

俱祔

明同知井東星墓 後志在留社村

明侍郎王之寀墓 後志在趙期村

明太僕李朴墓 後志在街子村

明副使張綸音墓 後志在小伏坡子副使好奇村

明主事李聯芳墓 在留社村 後志弟知州時芳知縣繼芳

墓俱在焉李標撰墓志天啟元年十二月葬公于沙苑北岡

新塋

明叅政李用中墓 通志在范家庄

明知府惠戶實墓 後志在南社村

明通判雷大道墓 後志在縣西原

本朝知縣王報春墓 後志在平羅村

本朝知縣劉璽墓 後志在故現村

本朝編修張表墓 後志在倉西村

本朝雷栢林于霖墓 于霖自撰墓志葬於西原祖塋

朝邑志卷一 十

本朝李河濱楷墓 後志附葬留社村父聯芳塋羅八琮撰墓

志康熙九年閏二月卒次年十二月葬邑北留社祖塋之右

負離揖坎

本朝推官王鏞墓 後志在新市鎮

本朝中書張召南墓 後志在新莊村

廟祠文廟在縣治南元建明及本朝相繼增葺 元成好德

明郭良 劉裡 鞠鏞 郭實並知縣 明卞禮 甘淑並縣丞

本朝王承庚 陳昌言 王兆鰲並知縣 以上並增葺文廟

人

城隍廟在城南明建又一在倉頭鎮宋建

明王學謨重修城隍廟記我太祖高皇帝誕膺天命為百神

主洪武元年詔天下邵縣建城隍廟封爵有差以帝以王以

公以侯以伯三年以爵不應經意改稱本號司官民善惡凡吏於其土者始至必齋宿廟舍先與神誓而後視事祀孤魂則以神主具祭蓋寄以幽明之責誠要神也古不載祀典唐李陽冰一爲縉雲城隍廟碑其文不過三數行然亦非制也我高皇帝始著之令典徧祀於天下聖謨幽潛神道設教之心度越百王矣吾邑城隍廟成化中祥符李公英增拓之宏治中南陽蘇公槃重新之嘉靖中澤州郜公相再新之二十年來朽蠹剝落日就頽圯今劉公始加修復夫有司之職治民事神二者而已然惟賢者則敬神否則自絕於神何敬之有故賢者惟恐神之不靈不肖者惟恐其靈也賢者潔已愛民弗得其人將求之神是故惟恐神之弗靈無以鑒已之誠不肖者黷貨虐民外欺乎人必忌乎神是惟恐神之靈以燭

波之隱然神之靈不可昧也白廟之建垂百七十年而中間長於斯佐於斯幕於斯不知其幾而修之者四公蓋皆循良令也故於神崇焉是役也不取之民不取之官於有罪者從惟輕之典以示罰故用而不費成之速而民弗知勞劉公諱尚義晉之汾州人以名進士拜監察御史謫判秦州稍遷至今職其先大父諱志嘗丞朝邑亦以廉著云

本朝李楷初冬幾望至城隍廟 小愈得扶杖神明不我苛享獻列粢盛吾民猶飢餓伎樂備八音商旅難百貨皆幸一時康不知計或左冬初遽祁寒無衣非婦情處堂燕已非噉噉鴻來過百穀十一成來牟種濕播雨淫早堅冰手足凍欲破站站見飛鳶若自雲霄墮陰官正而聰僅存指相賀或求意中福或免意外旤持此告陰官哀我民良懦五刑典罰緩

春風明堂个

風雲雷雨山川城隍壇在城南

社稷壇在城北

邑厲壇在城北

八蜡廟在城南明建

名宦祠祀李英

蘇槃

魏傑

王喬棟

知縣

卞禮

縣丞

翟方

教諭 六人

鄉賢祠祀高翔

程濟

喬誠

韓倫

劉偉

王蚤

韓紹

宗 韓邦奇

韓邦靖

程範

王朝雍

嚴天祥

雷士

禎 王嗣美

李用中

王之霖

李朴

張綸音

王惟

精 李聯芳

張孚貞

忽麟廿二人

河瀆祠唐書地理志朝邑有河瀆祠

唐王延昌河瀆神靈源公祠廟記中國經濟瀆河為長上應析

木下朝扶桑演崑崙踰積石綽大漠經龍門灌注九州之間

經營萬里之外鱗介所宅神靈所都元冥總之以命官憑之

以為伯唐堯觀諸龍圖肇見周公沉璧榮光發祥元符之末

彪炳彰灼古先哲后罔不欽崇奠封居之儀修壇墀之制存

乎祀典代以為常則班固序漢書所謂何祠臨晉是也偉其

南直太華左臨中條渭水過其旁汾睢揭其後風雲相盪精

氣交馳於以禮神事之宜也不然發源自遠地則多漫胡為

不昭晰於他邦獨受享於茲土前賢經始抑有其由至於春

以泮凍秋以涸流初以歲禱終以報祈嘗醪有加駢駒是薦

蓋以在雍州之域通天子之都地既稱雄禮云異數與夫淮

流桐栢江出岷山僻在遐方莫我京也幽贊之力實賴何公

以潔爲清瀾至於數四息昏墊之苦絕羨溢之憂濱河之人  
潤無大害此靈長之德上善之功也祈以正直享以精誠未  
嘗不誘其來而降之吉也或進以便佞言以矯誣未嘗不奪  
其魄而貽之禍也歲大旱而作霖雨時大札以惠嘉生依仁  
而行惟德是輔天寶歲安祿山稱兵朔裔肆逆東夏焰燧扇  
燥烝人熟焉宗社有綴旒之危土庶畜阡原之懼太上南幸  
肅宗北巡賊相張儒據有長安賊將崔乾祐固守蒲坂今關  
內河東副元帥中書令汾陽郡王郭公時爲兵部尚書門下  
平章事朔方節度使訓兵誓衆超百二之險謂此邦底定則  
京師可圖虔禱於河潛軍以往金鼓掩夜渠魁出奔遂收蒲  
城神所遵也及師次渭汭陰霧晦宴公假寢之際夢河神謂  
曰永豐倉側將有急變不如速退姑以避之比全軍及郊虜

已雲合克違寇難神所扶也其後李國貞之遇禍公復總戎  
故絳僕固懷恩之逆命公又出鎮河東大君曰盱食中外騷  
擾公獨奮無前之勇馳不測之深始按節而來終奠醑其邁  
所謀必克無往不平再安叛渙神所相也爰自兵亂以迄於  
今時更十年代歷二聖國之氛霾惟河公蕩滌國之土宇惟  
河公廓開國之忠良惟河公保佑國之奸慝惟河公殄摧誠  
靡幽而不應澤罔微而不該得一以靈不其宜哉汾陽王深  
維據我屢崇昭報奉牲玉莫敢愛也致精意未嘗怠也每蠲  
吉歷選自郊徂宮奠於堂戶之間則神之昆弟具在酌於屋  
漏之內則神之伉儷攸居文墨相望男女無別公曰神人之  
主也禮政之源也人有上下則禮有內外之制人所謂否神  
具可考盍築館於後以安靈匹乃諮於副元帥副使太子賓

客御史大夫知河中府事崔公寓量功命日而後役於河西  
縣大夫李開不徵貨財不殫日力曾不踰月克復於成大厦  
耽鬱其特起內寢旣立神儀穆然於是齒危髮禿之老王端  
等進而稱曰大河浩蕩敝邑之望也自公仗鉞三至我里靈  
應盼饜未嘗或欺國之克復實始於此安天步於艱定人心  
於驛騷大君成湯武之功賢相保桓文之業皆神之由也矧  
內寢棘翼今茲有成此而無述何以示後願刻樂石以彰厥  
庸公教曰諸公之辭固不可抑頌祇則可無推美於子墨客  
聞敢繫辭曰浩浩長河中國之紀洪流激射橫致地理蒸雲  
吐霧薦圖効祉是曰經瀆斯爲德水聖唐六葉巨猾挺災擲  
邑靡城如霆如雷汾陽矯矯仗鉞而來乃臨蒲坂神實先導  
乃亂渭水一一胥告嗟我上相神之所勞汾陽之德溫恭正

直柔嘉維則忠勤是力秉心泉塞不測不克東西南北勦絕  
奸慝入登九命一人是毘出統三軍四方是維維言祐之河  
公降禧衆神在列曾未區別公爲之節內寢攸設寢廟亭亭  
中外有經濯濯厥靈妃耦攸寧於戲詞宇焜耀中土在河之  
澣在城之下刊茲片石照灼千古

宋陳振河濱廟頌惟此洪河自大觀以來變濁爲清者略有  
三焉乾寧保平率以累日惟二年冬見於同州之韓城郃陽  
其袤百里其久彌月詔遣尚書臣張勳持祝往祭旣抵其野  
訪故詞得破屋一區風凌雨剝頽圯殆甚懼不足以尊顯靈  
德上副一人誠報之意故已事而還請新廟貌詔可其奏旣  
賜幣券以經其用又出大農之錢以助其不足鳩工飭材一  
不在民庀事於政和元年秋八月之壬寅落成於二年春正

月之甲子凡爲屋之楹三十有四堂崇以延門嚴以閱有廡如掖有屏如植籩豆之設有位侍衛之列有所輪奐丹雘嚴無不肅乃賜靈源爲號因命擇詞臣而記其事部使者猥以屬臣振臣振不敢以荒菲辭竊惟洪範之數兆於五行五行之證原於五事嘗以傳記考之河千歲一清其應在人君壽考天下治安今接歲三清應益昭著自非睿聖撫運溥博淵泉通乎高深何以及此是宜有以鋪張闋休揚厲偉蹟而昭乎無窮也如臣龜壇之陋顧安能識咸寧之太和而調達之姑以區區之見述其萬一而預榮焉臣謹拜手稽首而爲之頌曰皇帝臨御十有三年禮制樂作典章燦然道德之妙格於皇天景星慶雲膏露醴泉諸福之物克臻其全大觀之初濁河三清乾寧保平郃陽韓城有泓其澄有光其榮詔遣臣

勸報祭惟精乃新其宮靈源其名郡縣奔走累月而成神歆其類旣安且寧皇帝有道山川受職璽符來貺惟神之錫皇帝有道受福無疆神之聽之德音不忘簿領臣振預榮釐事作爲聲詩重千萬禩一

本朝 李楷河濱賦儉父歸自海西思邑中故實凋零欲爲賦以紀事郭璞木華諸賦不可及復觀西都上林甘泉之牘與文子太青西都賦乃知賦者詩之一義極陳其槩所以示後雖才巨細殊感又曩今各異使昔喆可作於今日必不捫舌於是恠陳鄙懷薄摎翔實質不組華譔非雜物仰溯先牒並著其系度爲李氏之雲裔者知卜居之權輿乃若風土涼瘠輪蹄絡繹士民呻嘆撮其旨於葛藟之言或足爲輶軒使者之所諏豈必曰溜澆而體物乎遂賦曰聖庭堅之邁德徵李

氏之明裡綿柯葉於薄海予獨處於河濱溯鼻祖之來遷傳  
避禍於紅巾踰虞帝之峻坂歷蒲關之修津未神龜之荊灼  
遂披剪於棘榛考槃乎沙苑之曲阿正當乎金嶽之嶙峋恒  
敦采於耘耔旣發祥於幽人時則帝祖龍飛於淮泗雋才博  
選於咸秦偉地官之就辟淑聲問乎名臣予顯祖之至孝克  
韞玉而秉醇謂農者之有畔盍仄注而垂紳於乎王父儒苑  
席珍芹橫有彩螭屈將伸俛得問鼎履素潛鱗戶外履滿座  
上經陳將鳳雛於習飛嚴鯉訓於夕晨迨躬耕於隴畝多拮  
据以勞辛父子不辭於胼胝兄弟不解乎憂輦必物躬以則  
古聿振譽以亨身藐不才之跣跣少從遊以蹄輪丁年華之  
舞象猶未免於同塵弄清渭之灑滌涉洛汀以逡巡思有訊  
於河伯顧紹介之無因陽侯時爲之瀉瀉馮夷又爲之粼粼

赧澹臺之無壁憶瓠子之勞民弱冠未宜乎載質揆書謬玷  
於國賔已而燕庭不售吳會阻飢踉蹌海濤栖止江扉遲之  
又久白首而歸二三小子函丈是依欵欵徘徊左右不違乃  
與之咏歌以自廣讓洪川而相非咨星源之遙森媿天漢之  
希微繫千里之一曲入沙磧之窮圻何容納之不擇見濁河  
之無輝諱崑邱之修亘環神明以成幃攷禹蹟乏封濬惟雍  
州之樞机茲焉髣髴其泮水念昏墊而沾衣視韓原而猶怒  
注天中以張威殺以徒駭之九道趨乎溟渤之四圍予知君  
之不留聊過我以相揮原夫乾坤不改不川由舊炎溽焚空  
谿水削瘦暵旱魃之螫人雖宗神而莫救憾水府之未有靈  
劫蛟潭而與之鬪灌溉鮮龍骨之輪祈禱煩木郎之呪疑明  
旦之無情恐蒼黔之不壽豈不懲於凶荒每先憂於邊豆於



時萸稗盈於河糜菹施生於園囿渴烏恣日中之喙青旌燥  
水干之味分餘潤其未可思樂土其難就爾乃滔滔於前濛  
濛於後異邊庭之旁達宜濛洄而承溜故兩河之人禍亦山  
川之有咎此則河之夏日感虐讐與撫后者也涇渭時至不  
辨牛馬汜濫橫流夷高爲下伊懷山而襄陵遂浸城而漲野  
廬無一枝之營巢路有夜哭之鰥寡固爲魚之不免又乞鄰  
之靡假曲突濕萬竈之烟粒米比五色之鮓懷陶復以安宅  
懼淫霖之常灑尚安得乎寧居亦謾應以衣瓦禾黍未登於  
櫛比馬鬣或災其梧櫝慮九天之高遠控災傷而難瀉眺沮  
洳之淖泥拊鉏耰而不把舞鳩鵲於荒灘盤虬螭於廢廈會  
殿屎而呻吟誰醕酹於杯竿彼膜外之何人吾惕中而如撻  
此則河之秋水譬不祥之躍冶者也鬻發颺騰河水作冰初

如微鱗之浮出薄毳之遐升繼則厚如犀鎧絮綴吳繒旋循  
碕而增壘漸疊石以爲陵激危濤而不逝結大勢以堅凝雪  
嶼岸寧於萬疊霜烟空滿於千層隱隱乎暗雷之砰鉤而震  
磕淒淒乎寒林之嶮崔而嘈呖不龜鼉而爲梁旣老狐之相  
仍龍如駟以險渡津無楫而駮乘當是時葭灰未煖凍日難  
登龜手長年之獐豕凍僵餓夫之填膺此則冬河之變姿亦  
可厭而可憎者也泉源鮮渙堅腹微泮叢谷深岩之崩濤桃  
花錦浪之拍岸寫赴海之雄波聳躍龍之巨觀卽曝腮與燒  
尾驚震霆於巖畔利臙臙之迅駛乘安瀾而無患惟辜池之  
形鹽與石穴之煤炭裕民人之尸饗誠有功於炊爨乃翔舟  
於方國聆黃頭之浩歎歷不測以輕生苟非貧其何羨疇好  
遊而留連陵砥柱以繾綣方秦晉之諧睦斯貿遷而和善飭

騏驎之不東嚴國禁之私販暨雀舌之不西艱江南之茗戰  
此則春和之冲融宜閒暇之汗漫者也河身靡定河口肆嚙  
昔傍姚墟之墉今吞蒲關之業蕩析故封嫁禍無節婢子遺  
租庸以竭膾膾田塍晉魏是劫迫於荼毒乃拓乃桀桔穗禾  
登京坻未列金鉦晝鳴斧鑕繡血鬼號於沙岸之波冤流於  
重華之闕固虞芮之間田何肝腦之凶裂匪敵國而用兵畏  
鄰疆之有截如孤注之捐遺俾同井其離別結衆愁而爲雲  
愴微虻之蝕月畦失甘瓠野無瓜瓞飄颺荻花芟剪蒲葉蹇  
衛鳴櫪罷牛臥轍孺穡不肥獫驕屑越此則津東之偏苦撫  
鐵牛而悲切者也眎我郊垆斥鹵荒漠烽埃夷然牆垣亦惡  
鹽升土腐苗瘁鋤弱無煮素之牢貧見衰蓬之寥廓莫不悲  
甌脫嘆堯堉塲則石堅而輟耕潦乃瀦野而爲壑畝無鍾石

之登民鮮襦袴之樂復有異聞田獵是作無龜兔之迷離恣  
馱馱之盤礴疑古人之戰場嘆溝渠之引洛其在曲孺憑陵  
官署攸託恐彈指其如破甑每觸瞬而憂朽索砮堡連衡軍  
衛衝突村樹童禿兵鋒芒鏑蟻蛭不足以禦寇蜂房聊見其  
聚落或貸金而服賈或泛萍之飄泊勞機杼於空閨嗟砧杵  
於曲薄衣布結鶉食新惟藿尚任卹之爲思於詐詭而知忤  
勤正供以爭輸羞痕瘡於鞭朴此則津西之所痾每緯繡而  
吟號者也若夫穀函枳棘雲潼不守於焉孔道絡繹奔走鬻  
產賣兒供億紛糾一馬丁年婦子羣咎五羝出牢屠夫傷手  
猶不能快其飛騁之策飽其饕餮之口罄里井之擔石恣公  
家之升斗胥徒猙獰如虎之負嶠市闐閉藏同獸之匿藪桑  
柘無樹巔之鷄麩蕪罷洗腆之酒悵靈波之荒疇哭沙苑之

衰柳摻漆沮之頰魚徵太白之雪藕且也訪海錯與山珍期  
庶品之富有地覆重茵筵列瓊玖織罽繡文之交設都梁艾  
納之相友無物力之充物奚奢華之苟苟此又古道之不敦  
而宰河濱者所以掣肘也能無憂哉二三子趨而進曰微夫  
子之言吾儕其不知憂矣請自茲勤於生聚儉於應酬迓百  
福以集止服聖教以優游

河水祠漢書地里志臨晉有河水祠郊祀志河祠臨晉司馬彪  
郡國志臨晉有河水祠晉書地里志臨晉有河水祠

西海祠唐書地里志朝邑有西海祠

案三祠無可攷舊云俱在故大陽社明時圯於河

東岳行祠在西門外宋崇祐觀也有政和九年牒

尚書省牒同州朝邑縣崇祐觀 牒奉勅宜賜崇祐觀爲額

朝邑志卷一

十九

牒至准勅故牒 通議大夫守左丞王押 起復少傅太宰

押 少宰少保押 太師魯國公不押 政和八年九月十

一日牒

陝府路都轉運司奏據同州申據朝邑縣本縣耆老人戶賈  
等狀本縣城西有岱岳行宮地居高阜殿宇宏壯屋舍計一  
百九十餘間自來清道士王永清住持焚修每遇亢旱祈求  
雨澤皆獲感應人民無不 仰伏乞敷奏朝廷賜空觀名額  
本縣側近並無空 遇天寧節 建道場委是順便本司保  
明是實伏候勅旨

關帝廟有三一在城內井巷一在東門外其在東門外者乾隆  
四十年爲知縣事吳忠誥重修并增置崇聖殿又一在趙渡

鎮

相傳趙渡關帝廟成化中里人重修時琉璃匠絳縣谷伯倉告歸低徊失期督工人李耀默祝神前其夜倉忽張皇在廟自言就寢聞扣門疾呼者出視見神乘馬厲聲令瞑目卽攜附馬後少頃排落於此衆初猶未信居無何其妻以倉夜出莫知所往尋訪至廟見倉悲慟始大相驚駭此李公用中碑所述耀乃其高祖也

文昌閣在縣城外東南隅

忠孝祠在文廟西亦名雙忠祠明時爲高翔程濟建也

節孝祠在文廟東亦名三烈祠明時爲龍門村劉烈女嚴伯村李烈女西莊村張烈女建也後又以節婦十六人附改名韓邦奇劉烈女祠堂記 烈女旣歿三十年苑洛子爲之傳又三十年郃侯始建祠考而祠焉旣而伐石構亭將請文撰述

本末而郃侯以卓異徵矣旣而紀侯敷奏至京受郃侯之托歸而言之王侯陳侯永終是圖夫自光岳氣分人無全節雖芹宮碩士類朝燕闕而暮秦庭矧蘭室麗人能却魯金而完趙壁斯亦不足崇之廟貌薦之牲牲勒之貞珉銘之燹鼎者乎此郃侯所以興思仰止表樹於前而王侯紀侯陳侯所以濟美協心緝成於後也烈女者朝邑龍門村人也幼有至性長不踰閑從德度人針絲絕類雖目不知書而心涵大道足不履外而情見大觀若夫色雲護翠竹於階異樂擁仙娥入寢此又其母誕烈女之祥而兆之夢寐者也天人之際靈秀之鍾亦豈尋常也哉烈女幼字里舍兒未往之家而里舍兒死烈女聞之易服不食涕泣請殉乃復自謂死得其所重於丘山義或未諧自同溝瀆往就諸兄偉而質焉偉曰異哉斯女

也夫歸妹天地之大義從夫倫理之宏綱顧恒一之風久而不作而大過之行俗之所駭雖子之甚善如衆之所笑何烈女曰天下之理是而已矣苟卽乎此心之安又何恤於萬口之騰哉乃改女飾修婦容縊而死焉嗟夫西周之迹熄而鄭衛之風行聚麀之羞閭闔相望鷄鳴之想風雨猶存故在醮之婦釐裝以自悅五妬之女冶容以媚人烈女雖綠藿之傾惟陽是向而芳梅之隕於春未知乃能舍生取義殺身成仁抑又何所爲歟且其就死之際詳擇所托雖化聖大賢之從容無以加此彼烈夫志士之感慨者未足論也非所謂得死非難處死爲難者乎昔五泉大夫將探拾烈女之事入於縣志執其傳而泣曰斯人也所謂建諸天地而不悖質諸鬼神而無疑百世以俟聖人而不感者也嗚乎斯言也盡之矣夫

其高標峻節絕操清風使君子興悲方之至理則百世而下可徵矣夫仲尼臨河傷類而悲燕士適越見似而喜烈女之行尚矣郃侯王侯紀侯陳侯秉爨好德之心興賢翊正之志亦不足稱歟祠堂正堂三間門房一座偉監察御史識高而行正故烈女質焉郃侯名相澤州人王侯名思賢樂平人俱大尹紀侯名年曹縣人二尹陳侯名廷桂五泉大夫里人韓邦靖苑洛子者韓邦奇作是記者也

真武閣一名無量閣東門外

河神廟在真武閣俞乾隆四十年知縣吳忠誥勅建今祈雨澤皆於此

三皇廟在西門外

禹廟在大慶關社西

太公廟在大慶關社東

漢高祖廟在柳村

王三省廟記 朝邑城東南五里許曰柳村柳村邑附郭人饒於財而尚禮以故修葺神祠歲時享賽人人願也成化中行之父老創建漢高帝祠祠之東西附以他神前爲樂樓繚以周垣迄今五十餘年樓殿宮牆漸就頽圯風雨不蔽豕羊外來村人許式輩偕重修之嘉靖丙戌及甲午歲蓋兩用力焉而增飾於其舊至是式輩謂予宜記之予惟關中古秦地也始皇君臣以及二世荼毒蒼生海內嗷嗷朝邑爲之近郊橫政先被其苦秦之苛而樂高帝之寬固當時之人情也今去之千有餘載鄉人知慕高帝而爲之立祠又慮其廢且壞也而復修之人心好惡之公烏可泯哉古之立大事者必以

得人心爲本而帝王之興驅除殘虐焉爾高帝入關之初約法三章與民更始秦父老大悅爭持牛酒以迎其軍惟恐不王關中此與成湯之伐夏武王之伐殷簞食壺漿以迎王師者何異乎人心非惡秦之深而與漢之速寬猛之道殊也書曰撫我則后虐我則讐又曰民罔常懷懷於有仁理固然也且秦之心欲傳之萬世然不旋踵而失之初豈有疾視其百姓之心哉弊在遂己之欲而罔念民窮勢積於不可爲而爲之臣者不以告也故保國者必先不失其民保民者必先不失其心三代之仁政也故曰三代之得天下也以仁又曰有功德於民則祀之然則漢固以仁得民而有功德於秦者也百世祀之也夫誰曰不宜故君子於是役可以知政可以化民可以興禮

漢武帝廟在上官村

吳起廟在霸城

九郎廟在北門九郎山卽梁山東北峰有奕應侯廟廟有聖水  
歲旱挹水則雨立降順治中禱之有驗因立祠祀之

李楷奕應侯禱雨靈感廟碑記 事無裨於民者政典不載  
必擇其利益之者而舉之祭祀亦然祀有正有淫淫當黜正  
當修古之道也奕應侯者何謂九郎也九郎者宋人祀趙氏  
而隱之也趙氏在春秋時爲著祀於梁山奕奕梁山故稱奕  
應侯焉朝坂距韓城爲邇有祀之沙苑之北洛河之南者或  
疑其非正祀今乃創祠於邑城之坎方人相其宜土卜其吉  
弗疑弗阻者何也祀雨神也神之司雨何也山川出雲天降  
時雨梁山之祀神實主之旱而禱霖而報不但韓人祀數百里

中咸祀之朝坂禱雨而應故作廟也曷禱乎禱於山曷報乎  
報於廟禮以義起猶正祀也歲在庚子太丘丁公來令於朝  
值大旱魃公虔於禱爲壇於東郊儒者按繁露法象龍木蜥  
蜴令羽人舞者拜賔之陪貳皆拜又命良耆老十數人往  
卽梁山而求之神有嘉命許以甘澍主者迎神若有所承翼  
翼欽欽士民胥睹比及雨降人人意中有九郎也河濱生曰  
人而龍者多矣李藥師之滴鬢柳毅之洞庭於傳有之文信  
國生而潭水竭死而潭水溢又何章也士君子生爲聖哲死  
爲明神或司山伯或職水部苟不殃民皆可俎豆奕應侯其  
一也夫水旱亦何嘗之有民命在豐年國庾在八蜡一邑之  
山川社稷風雲雷雨祀之正也奕應之廟亦其正者也祠旣  
成乃鐫石以記之俾嗣續於無窮公名魁南河南歸德人庚

午鄉進士初任朝邑縣令其同時僚屬爲典史張洪業徽州府人

蕭何廟在縣治東

孫真人洞在西門又一在雙泉

李時芳寒食登孫真人洞值雨詩 石磴峻嶒薜荔寒洞中

龍虎自深蟠青回寒食來山雨雲結峯陰護藥闌一帶園林

春樹合萬家樓閣水煙盤廿年岐路荒三徑此地猶堪老鷓

冠

相傳雙泉鎮孫真人洞先時居人久議建祠未果嘉靖三十

四年地震後忽鎌山雲氣異常晝夜恒見衆視之崖崩出一

洞下有湧泉洞中自然成像彷彿真人遂因以建樓殿云

嚴公祠在東岳廟後

馬自強嚴氏祠堂記 嚴子槐亭建先祠祀厥先人十世之

小宗並上世異朝代而顯者唐太史令諱譔之太宗先是既

落成槐亭子以耄年冒風雪造余而請爲之記余嘉槐亭子

之仁孝敬諾之會余病未能卽載筆越明年余奉召起家還

闕下道嚴氏祠堂前入而瞻禮焉喟然嘆曰嗟乎自仁孝之

風微人家越三代而上率多忘其祖先諱字矧厥祀祠槐亭

子負博洽之學不難於芥拾青紫顧格於數不究厥用往往

見於著述如漫錄之類乃重老猶能敦水木本源之思如此

謂仁孝之至非耶紹厥芳懿俾永無失墜又在其後人奉祀

者而凡他孝子慈孫觀於嚴氏亦可汕然而興起矣槐亭子

喜曰是卽可以記矣余羈然曰有是哉凶命從史書之題曰

小記云



王學謨記 邑原上故有唐詳審使嚴公祠諦文鏤天頤中  
通政蕭公斌白於邑侯申公潤名曰重建則知有始也者豈  
其公之陰德元善契符終古故展世君子惺惺有同好與維  
時護作爲邑子陳玉輩實成化之丙申春也偕事則少宗伯  
尉能左使楊恭少監李本憲僉周道主事劉讓奉常博士許  
彥常知府賈惟敏知州許清知縣歸儒秦理楊遜判官許莊  
後五十餘年爲嘉靖乙卯會地圯原崩祠圯久之蔑有義起  
者萬曆甲辰余屢與別駕雷公私議偕諸君子修復未果其  
明年乙巳邑侯馬公照臨城隍廟積有緡錢於是延諸鄉老  
白於邑侯諷日工作蓋自淑月經始旦月落成上梁之日侯  
仍臨薦雅拜余以漬病不獲瞻禮祠下企踵喁喁觀者謂誰  
昔蕞爾一區今茲增以三楹飾以斧藻因於趾視往巋然壯

麗宜有副墨紀往昭來永惟嚴公本是縣人名譔字善思墓  
在長春宮西南陬祠距莽蒼之間吾邑著姓嚴氏號多門不  
審支屬何在公高宗封泰山舉鎖聲幽藪科及第調襄陽尉  
居喪倚廬隱居不蘄仕進武后朝爲監察御史兼左拾遺內  
供奉數言天下事方酷吏構大獄摩牙恣睢公爲詳審使存  
心仁恕不事操切吏稱平和關三木者八百餘人所原者千  
餘姓罷疑不實者百人當是時屠伯蒼鷹鍛鍊周內不翅束  
濕以取位逢時公獨多所平反行我陰德卽遭讒播遷而不  
阻不悔事載文皇帝爲善陰隲書中迺者 學正紀猥以占  
風角之故罷公祠鄉賢無乃略大體而過於吹毛求癥者曾  
謂存心長厚正直不撓而猶不得列於君子之列耶余意不  
能平業已駁論邑乘是以嘆世俗見毫毛不見其睫誠固於

爲月旦而其識下於高叟遠矣

韓荼簡公祠在東門外

五太土廟在南門外

太白廟在寺后社

雷于霖太白廟記 明崇禎七年夏大旱邑侯張諱三策河  
南浙川人命里人李栢等登太白山探神湫泣懇靡遺歸而  
雨遂沛然官民竒異神功肇造太白行祠嗣是兵火鼎革里  
人不敢違初願越十載而祠告成里之父老集衆而謀曰吾  
儕旣築蓀璧紫壇以薦松火再選星冠斗步以効巫咸其事  
神者似至矣柰煮蒿祝史之需歲歲徵之將里兒厭其瑣尾  
是不可不久爲計也時社有居士李銓韓錦等共施善地勒  
之貞珉世供掃除邑人雷子于霖銘曰封夷蓬起駕豐隆太

白雲駢忽爾東流鈴颺火役青童閃爍金蛇搖馬駿倒翻銀  
河驅祝融粒我蒸民賴帝鴻倏而雲兮倏而風我欲留連郵  
不通一歌一泣巫陽忠願神愴愉無忽忽椒漿瑶席奠碧翁  
龍堂鮫室鬱蕭宮神兮來遊降我衷蒼雲青雨隨玉驄春葩  
秋穗鬱青葱遠除蜚蠊并蝨蠹願將撮土勒神功願言施者  
祚無窮敢有侵田與欺種披髮大士劔凌空

馬神廟在東門內本明建在縣南本朝康熙中移

雷于霖記 邑界秦晉津梁之處是時軍旅雲移賓客星奔  
厖人不任羈紲之億也而殷事馬神神樓舊貫三楹茲殿前  
構亭以享神也門外架樓以衍神也內附財神土神旁祀孫  
焦二仙野祀無秩彼有取爾也匠石善選工師善斲洵鉅麗  
哉春秋釀祭極獵校之盛盡聲歌之選男女雜踏而聚觀者

萬人時有客乘傳而過挽轡停鞭而稱之曰度矣哉富矣哉  
雷子懼解之曰客見蓀壁紫壇雲棟虹梁其棲神者泰歟外  
此而烽燼焰銷風雨莫蔽者誰及見之客見蕙葳蘭蒸瓊糜  
金漿其衍神者侈歟外此而蝗飛蠓現井荒灶寒者誰及見  
之客見陳鐘伐鼓遏雲繞梁其康神者靡歟外此而逋賦避  
役泣洒郊原者誰及見之客見錦綺驕童飄映日之輕裾繡  
箔艷女整如雲之逸度其簇出旅賚者麗歟外此而 足囚  
首縲絀莫釋者誰及見之客曰微夫人之言吾不知朝之外  
腴而中餒也噫祭器之正漫藏之戒以俟在外之君子  
李楷詩 途衝芻秣累人民鼓吹嘈嘈報馬神馬神三日靈  
官似何不驅鴉駕火輪 非驛非郵過客驕牛車滾滾不相  
饒牛金星日同天次誰謂鳴聲異泣號

二郎廟

劉峒記 二郎有功於民之正神也而世不知其所起故其  
說多誕妄幾同淫祀予至蜀蜀人言二郎姓李與夙所聞異  
蓋爲秦太守李冰治水有功於蜀史傳其化牛鬪蛇者也或  
曰冰之次子故號二郎喜與龍戰其變化神奇當時蓋有其  
書而今亡矣予過龍公洞人猶有指其遺蹟謂予者故蜀人  
崇奉甚嚴謂之川主其神像有五中坐黃衣少年如常像左  
右者形狀奇詭皆云二郎變化以降蛟者昔宋太祖破蜀花  
蓋夫人奉之宮中太祖見而驚曰是何神歟對曰灌口小二  
郎也自是天下多祀之而道釋兩家又藉其威神以鎮魔護  
法故其神赫赫古今庸人孺子亦敬欽之與關聖並然而能  
捍大災救大患合於禮典非淫祀可比俗人傳說疑爲趙昱

皆妄也新市自宋至和以來有其廟予觀此地近洛水時  
溢崩決民田祀此神者殆以灌江視洛水而取其降蛟安民  
之威乎明末廟爲洛河所淹雷定興公率衆修之於今四十  
餘年風雨之浸修葺不時正殿破漏樂樓傾壞於是四街同  
修而各紀其功其西街長者請記於予予厭聞崇鬼神之說  
非厭之也天地日月山川古之聖賢忠孝節烈之精英赫赫  
朗朗在人耳目者日俎豆而歌舞之誰曰不可獨怪二氏袂  
禍福之說莊嚴廟宇崇禱不法之鬼神以奔走天下無益於  
生民而靡下里之財穀士君子亦從風靡爲不可耳二郎雖  
非此方之正祀然能著奇功於當世則精英之氣何所不在  
而百世之下蛟龍妖孽聞名而畏望像而慄固其宜也祀雖  
贅乎亦可以福予故辨其所起明神之正知神之正則修廟

誠爲有功矣

寺觀

金龍寺在邑城西唐貞觀元年建

李朴詩 隨喜無遠近金龍訪惠休曇雲千佛日春色萬家  
樓棟宇齊梁舊禪堂古木幽孤僧迎我笑共擬虎溪遊

饒益寺在新市鎮梁天監中建唐貞觀二年起十三層浮圖明  
地震浮圖圯有藏春塢塢內宁唐時題名金新市監趙抃有  
記明初當事者議以石充潼關修水門用古物盡亡今惟宋  
賈炎謝卿材題名金趙抃記石存

宋賈炎題名 先考成正公留題 顯謨閣待制提舉南京

鳴慶宮賈炎政和三年歲在癸巳交五月蒙恩罷延帥領眞  
祠奉母歸居穎曷與諸子公說公燮公傑公轍公節公燁

烈公協公頡諸孫遙運姪孫道同道氏寺二十九日題 政  
和五年交自鄜延帥蒙恩從請移守南陽九月二十七日侍  
親道饒益寺顯謨閣待制新知鄧州兼京西南路安撫使賈  
炎題諸子公哲公燮公轍公節公燁公烈公協公頡諸孫隨  
海壽海隆侍行呂元明馬元鈞偕來 宣和九年四月初八  
日男承務郎充專一總領措置陝西路鑄餘司准備差使公  
傑親摹上石河中府張崇智刊

宋謝卿材題名 朝散大夫臨淄謝卿材仲適元豐癸亥被  
詔自歷下移守馮翊三月二十六日過饒益寺題主持賜崇  
智欲立石蒲人眞元亨模刻

金趙抃記 左馮之東南踰三十里縣曰朝邑由縣之直南  
林木翳鬱小徑縈紆約有十里有鎮曰新市鎮有寺曰饒益

朝邑志卷一

二十九

乃陝右之名藍也路當秦晉要衝枕山河之形勢自唐宋以  
來名臣賢士經由往返莫不稅駕投憩於此或題名於壁或  
留詩於碑不可勝數前後主僧慮歲漫滅悉勒之於石寺遭  
兵火焚毀殆盡如前人石刻往往埋沒於頽垣遺基之下抃  
承乏命領鎮事至此恨不及見饒益全盛之時實爲不足每  
暇日命童僕事鈔築搜抉於荆藁瓦礫之間雖獲名公大臣  
之行記詩刻例皆斷折訛缺讀之令人悲惋卽其稍完者萃  
而置之於藏春塢壁冀後之游觀者興葺之不替然周覽環  
視必思其人焉時阜昌癸丑九月初一日東萊新市監趙抃  
記

王三省賦 湛先沙門暨師淨章謁予致詞詞旨孔詳謂吾  
寺之塔肇自隋唐歷年旣遠圯廢相將乃有隣近孤僧擔簦

釋子共闡祖風思隆元旨加以四衆施財諸賢捨已役供力而聿來陶獻費而戾止損常直於工人得佛牙於居士於是經之營之完矣美矣蓋金仙之教浹於衆生故寶塔之成式章仁里環以新市之紅塵抱以洛川之綠水冥冥孤高亭亭峻峙十有二級巍然而起億萬斯年莫之毀矣維昔國祚初興龍戰甫畢城郭載修甃石未集何物守臣思用塔磚舉砲不震舍之去焉其基猶故形則稍偏斜倚霄漢百七十年歲月茲久父老猶傳雖興廢之有時實玩賞之莫先爾其化自西天燈傳南部供養之禮何專舍利之藏已固今則人樂勤於法門事易舉於淨土考以洪鐘闐然信鼓朝而慈雲暮而法雨氣凝瑞以千層烟飄霞而一縷棲鴿去而復來天花落而可數象教攸崇檀越無苦匪直爲百里壯觀十方快靚而已

也爾其彩色新塗危標莫狀驚心巖巖奪精滉漾炫白日之輝輝接青天之蕩蕩宇宙希聞雲霞與抗客或努力以升攝衣而上以見四方消百妄撫掌狂歌披襟遠望俗慮皆除美懷何暢喜清風之徐來發白雲之孤唱逍遙天上之光陰狹小人間之色相河上翁招之不來雲中君與之相傍又或天宇寥廓平原遐曠樹叢密而不分村連絡而莫障滔滔波浪三水中分屹屹巉巖兩山相向又或南望望仙武帝何荒北望長春離宮可愴西望馬坊雲錦無遺東望潼關金湯何壯又或春望夾岸桃霞舖錦夏望連畛麥浪搖風秋望園圃柿梨垂實冬望林麓雉兔交蹤又或晚望則星辰可摘早望則雲日交輝雨望則千家簾幕雪望則萬里瓊璣又或水望則舟航競渡市望則交易喧逐喜而望則燕昭之懷賢思至愁

而望則漢武之悲子思來慕長風若滕王之閣憂蔽日若鳳  
凰之臺又或棊分城市星數房闈山呈落雁地露采薇蓮峯  
隱約蒲坂依稀足下雲生而日近目前樹遠而天低下院不  
聞僧說法落霞時與鳥爭飛黃鶴樓高安足擬青蓮宇壯此  
堪依已而日色將暮天風颼颼客心斯倦去而且留則又八  
竹院訪惠休坐蒲團而啜茗過蘭若而停輶詠海棠之花方  
茂見木蘭之院初修或許飲酒而入社或憶袈裟之在舟或  
悟前身寫經未了或邀密友齋限初周或留帶以爲鎮寶或  
贈衣以表綢繆樂聽三軍之衍姑爲半日之遊先生其有意  
乎予曰慈恩遊人留顯雁塔夜郎遷客把筆西陵君子之所  
有事也而僕病未能湛先又曰寺當衝路詩題滿牆勒石紀  
勝琬琰生光盍惠一言安塔之傍予曰筆硯久荒矧夫蠢蠢

沉思損神敢謝不敏

王三省詩 野寺傍郊廛孤僧偈梵筵聚沙窺色相危塔賞  
精專歲月禪門古山川陝服連崢嶸凌世界突兀俯雲烟鳥  
避鈴聲遠燈明法雨懸霞光扶繡拱香氣拂金天指顧黃河  
細登攀華嶽偏化成淹白日淨域護青蓮一逕通三輔雙眸  
眺入川顛連人臥病證果客逃禪遠覽非今日迷方負壯年  
何時超絕頂襟抱一飄然

王鉞詩 出門無好路動步與禪親近佛心如悟看花眼不  
貧老僧欣接杖小犬喜迎人不覺坐來久風吹月滿身

王傳詩 祇園花木碧陰森扶杖來看秋滿林寶閣天香馴  
鴿舞短垣翠栢暮蟬吟無生學誦僧家偈憂國時存壯士心  
一自端居成歲月水濱沙磧白雲深

淨安寺故址在渭水濱元至正元年歿於渭明正德中改建於  
王林村有宋崇寧時鐘

淨安寺鐘銘 維大宋崇寧四年歲次己酉十月二十五日  
鑄同州朝邑縣魯苑鄉淨安禪院鑄鐘願所集 利者

皇帝萬歲重臣千秋文武百寮常居祿位法界衆生同成佛  
果住持院主僧惠崇

助緣僧等法基 法直 法照 道宗 法 鑄鐘

功德主僧法淵

助緣施主等弟十四都保副正耿訓 趙茂 道洪社趙用

成

十六都保正蘇晏 副正趙永 嚴寶 邱德 嚴清 邱

善

朝邑志卷一 三十二

休没弓手節級 楊玉 劉五文 楊大專 唐新 安全

人趙社張整 馬進 梁成 李宗簡 李三郎 王漸

王昌 趙平 李茂 李言趙氏 陳迺 上官寶 耿

士林 嚴子成 孫清

十五都保正趙瞻 嚴方 耿同 張詮 趙三

伯 趙四伯 王大伯 趙四伯 衛八哥

本社姚福 安福 任文勝 范祥陸氏 楊德方崔氏楊

氏王氏 鎮將 言李氏楊氏路氏 小阿嫂 百初 王

旻 嚴大伯嚴五婆 嚴信 杜玉清 趙密 趙義 劉

十三 王二伯 楊三伯 王三伯 孟全 嚴三伯 路

五伯 李三伯 劉知

此鐘是解州匠人杜臻男鑄造



武騎

仕郎

將仕郎 州 南縣主簿 本縣事

事

劄給

將仕郎知縣事呂省山

趙松妻 陳氏李氏

聖佛寺在新大慶關唐明宗天成三年建宋乾德四年重修舊名彌勒佛寺明洪武二十五年更名

劉璽記 太河西厓東屯村有寺曰聖佛自五代唐明宗始也住僧每數十人於邑中諸寺爲最巨而土鹵易壞歷宋及明率數十年有力者率衆修之自明季甲戌重修之後圯壞

朝邑志卷一

三十三

者久之於今康熙二十一年僧始募修五年而功成請余爲之記余歷問前之倡修者若牛若劉若成皆顯人也而居林下者余迥然笑之夫佛之道見斥於吾儒久矣予覽華楞諸經其清靜寂滅亦自其學何惡於天下然由其道而忠孝節義俱無所用矣土方壯時將有爲於天下意氣方盛談忠孝矜名節佛教誠無由入及其功名心灰倦而思反忠孝節義之念與氣俱衰而聞空虛寂滅之說不得不好故前世功名之士晚路多入於佛入以爲惑非惑也盛衰之勢然也予近者空虛寂滅之念生與成功諸人何殊焉故崇佛之說得至於我前也况邇者 朝廷於佛生日 勅百官不得行刑則佛之道 朝廷 崇奉之矣况吾之無用於世者乎遂爲記以續成公後計所修佛殿十五間山門三間工五載費三百

餘當民窮財盡時功不易矣僧體成等募化施米施工數千人咸刻於石康熙丁卯年記

沙橋寺在紫陽之麓內藏元至元十六刊印本及明萬歷時刊印本內典本朝李河濱手書華嚴經今元本散落止存百餘卷皆不成全書李書存三卷惟明本猶多

廣惠寺唐貞觀二十一年建故址在街子村東今圯於河移置村南又南鹵村亦有廣惠寺

趙儒記 廣惠寺在朝邑東南二十五里洛渭之間又東南則潼關赴京師之通衢其西南則華陰達陝省之要路凡冠蓋往來值風阻河爲駐節留憩之所嘉靖甲午渭北趙子官於外二十年方歸時韓汝哲以刺史歸王德卿以戶部副郎將赴南都王季良張靜夫楊大節趙子春方赴會試韓子約

渭北子祖饒於廣惠僧舍韓子謂渭北子曰子知廣惠所以創始之年與其創始之意乎渭北子曰關中之地古稱形勝百二其形勢要會之地不在帝都岐豐咸長之間而在於此嘗考帝都之地則山有岐梁終南太白而無泰華首陽之雄峙水有涇汭灃渭而無河渭漆沮相會之巨浸此地則山自岐梁九峻迤邐而來入於沙苑以豐其後自太白終南少華太華以屏於前河自積石龍門徘徊首陽太華輻轉而東渭納汧灃涇汭漆沮并入於河則關中形勝要會一目可盡古人所謂天地并工開帝宅山河相輔東龍門又曰山勢雄三輔關門振九州皆所以咏斯地之勝故周齊隋唐沙門盛時好事者竊見其地之勝以建沙門俾人憑是而覽山河之勝則必於此徘徊瞻眺其建置可以與形勢悠久而無更變之

虞是則創始者之深意歟故北有饒益寺據舊志重建於貞觀二十一年則其創始於周之時可知韓子曰然是可以識廣惠之勝矣

聖壽寺在雙泉鎮唐建明時造又有在太平村上村北龍池霸城村西大夫五處亦名聖壽寺

輒置寺在東王寨明時有人於遺址掘後殘碑有文曰隋開皇四年建

興國寺在南王社唐貞觀元年建

興安寺在寺子村元至大四年建

資壽寺在舊大慶關明隆慶時建

興龍寺在蔡鄧村

興祥寺在故現

敬法寺在阿毘村

永盛寺在窪底村

東廣教寺在東野雀

西廣教寺在西野雀

安國寺在北健村

興福寺在下秦村

清涼寺在王彥莊

普濟寺在兩女鎮

安慶寺在步昌村

廣聖寺在店干社

新興寺東白池

大覺寺在南岐村

洪慈庵在加里莊

彌勒院在營田莊

洪教寺在沙底村

景德寺在南龍池

望仙觀漢武帝時建今廢地名猶存

威明觀唐清泰二年建在洿谷堡

靈應觀在紫陽山宋眞宗祥符四年建有元至元時鐘

靈應宮鐘銘 維大元國安西府路同州朝邑縣紫陽山十方

元都靈應宮住持道士張志瑀等至元二十一年歲次甲午

二月日置平陽府襄陵縣東水寨大鑑盧家造

皇帝萬歲臣宰千秋風調雨順國泰民安

康乃心詩 天然箕掌望中賒幾度安期坐晚霞路遠洛溪

朝邑志卷一

三十六

臨玉漏門開西嶽對蓮花已知白鶴仙人笑猶憶玄洲柱史

家我欲吹笙從子晉蹒跚初訪五雲車

劉璽詩 竟日看山坐悠然物外情鳥聲歸樹遠秋色滯河

清客喜杯無算歌闌月獨明神仙亦我輩聞笑出東瀛 今

宵天不寐知我在山阿樹老歸鴉靜臺高受月多酒聲狂士

鼓花氣美人歌莫負煙霞意得閒日一過

大元觀宋徽宗宣和初建舊在楊二社東後又河浸遷社西

保眞觀在豐潤村西